

四庫全書

集部

# 欽定四庫全書

集部

御定佩文齋詠物詩選卷三百七十六

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>何思鈞

校對官中書<sub>臣</sub>高 中

謄錄監生<sub>臣</sub>楊其梓

欽定四庫全書

御定佩文齋詠物詩選卷二百七十六

總花類

五言古

落花

梁  
蕭子範

綠葉生半長繁英早自香  
因風亂蝴蝶未落隱鸝黃  
飛來入斗帳吹去上牙牀  
非是迎冬質寧可值秋霜

賦得岸花臨水發

陳  
張正見

奇樹滿春洲落藥暎江浮影間蓮花石光涵濯錦流漾  
色隨桃水飄香入桂舟別有仙潭菊含芳獨向秋

和王褒詠摘花

北周  
明帝

玉腕承花落花落花中芳酒浮花不沒花含酒更香

詠園花

北周  
庾信

暫往春園傍聊過看果行枝繁類金谷花雜暎河陽自  
紅無假染真白不須妝燕送歸菱井蜂銜上蜜房非是  
金爐氣何關柏殿香裛衣偏定好應持奉魏王

于闐採花

隋樂府

山川雖異所草木尚同春亦如溱洧地自有採花人

浮遊花

隋辛德源

窗中斜日照池上落花浮若畏春風晚當思秉燭遊

灋上與幼遐月夜登西岡翫花

唐韋應物

置酒臨高隅佳人自城闕已翫滿川花還看滿川月花  
月方浩然賞心何由歇

對雜花

韋應物

朝紅爭景新夕素含露翻  
妍姿如有意流芳復滿園  
單棲守遠郡永日掩重門  
不與花爲偶終遣與誰言

賦得春晚餘花落

唐李益

留春春竟去春去花如此  
蝶舞繞應稀鳥驚飛詎已  
衰紅亂故萼繁綠扶凋蘂  
自委不勝愁庭風那更起

東坡種花

唐白居易

持錢買花樹城東坡上栽  
但購有花者不限桃杏梅  
百

果叅雜種千枝次第開  
天時有早晚地力無高低  
紅者霞豔豔白者雪皚皚  
遊蜂逐不去好鳥亦棲來  
前有長流水下有小平臺  
時拂臺上石一舉風前杯  
花枝蔭我頭花藥落我懷  
獨酌復獨詠不覺月平西  
巴俗不愛花竟春無人來  
惟此醉太守盡日不能迴

買花

白居易

帝城春欲暮喧喧車馬度  
共道牡丹時相隨買花去  
貴賤無常價酬直看花數  
灼灼百朶紅戔戔五束素  
上張

幄幕庇芳織芭籬護水灑復泥封移來色如故家家習  
爲俗人人迷不悟有一田舍翁偶來買花處低頭獨長  
歎此歎無人喻一叢深色花十戶中人賦

觀花有感

元虞集

挂巾花樹枝酌酒花樹下風吹巾上塵花落手中竿清  
唱起相壽毋遽且聊暇流光急去人莫怪行樂者

詠井底花移贈李太常

明郭第

素綆夜不垂寒波曉含潔嬌英被銀牀歲蕤弄澄澈對



月還對鏡堪賞那堪折細讀太常詩冷然瑩冰雪

七言古

風雨看舟前落花戲爲新句

唐杜甫

江上人家桃樹枝春寒細雨出疎籬影遭碧水潛勾引  
風妬紅花却倒吹吹花困懶傍舟楫水光風力俱相怯  
赤憎輕薄遮人懷珍重分明不來接濕久飛遲半欲高  
紫沙惹草細於毛蜜蜂蝴蝶生情性偷眼蜻蜓避百勞

買花謠

唐劉言史

杜陵邨人不田穡入谷經谿復緣壁每至南山草木春  
即向侯家取金碧幽豔凝花春景曙採來攜得將何處  
蝶惜芳叢送下山尋斷孤香始回去豪少居連鵲鵲東  
千金使買一枝紅院多花少栽未得零落綠蛾纖指中  
咸陽親戚長安里無限將金買花子澆紅濕綠千萬家  
青絲玉轡聲啞啞

落花

宋 孔平仲

嶺南冬深花照灼比至春初花已落乘閒攜酒到西園

鳥散蜂歸春寂寞江南此際春如何紅杏海棠開正多  
歸期不及春風日猶見池塘著綠荷

惜花

宋文同

遊蜂採花花氣薄黃鳥啄花花藥落林風吹花花片亂  
池水浸花花色惡少年惜花花會意晴張青幃雨油幕  
勸君直須爲花飲明日春歸空晚萼

飛花行贈馬衢州時馬在建舉別業

元戴表元

山上風花山下飛花飛欲盡山翁歸歸來亦自忘行跡  
但覺滿地紅依依餘花更惜隨春去谿上遊人山下路  
戀家漁父斷來蹤難老劉郎記前度花開花落春風前  
我昔與翁同少年祇今鶴去但華表何處鳥啼悲杜鵑  
遊人自遊春自暮從翁問花花不語且當向花日日醉  
醉倒花前學花舞

惜花

明高啟

惜花不是愛花嬌賴得花開伴寂寥樹樹長懸鈴索護

叢叢頻引鹿盧澆幾回欲折花枝嗅心恐花傷復停手  
每來花下每題詩不到花前不持酒准擬看花直盡春  
春今未盡已愁人纔畱片萼依前砌全落千英過別隣  
懊惱園中妬花女畫簷不禁狂風雨流水殘香一夜空  
黃鸝魂斷無言語縱有星星在蘇衣拾來已覺損光輝  
只應獨背東窗卧夢裏相隨高下飛

賣花詞

高啟

綠盆小樹枝枝好花比人家別開早陌頭擔得春風行

美人出簾間  
呌聲移去  
莫愁花不活  
賣與還傳種  
花訣  
餘香滿路  
日暮歸猶有  
蜂蝶相隨飛  
買花朱門幾  
回改  
不如擔上花  
長在

雨中看花

明  
楊基

青青楊柳深深竹  
雨裏絳桃開一簇  
羞將瘦蹇逐金鞍  
著屐看花仍不俗  
花枝淨洗胭脂面  
老眼驚如夢中見  
已撩春色過三分  
何止東風吹一片  
只恐天晴是暮春  
半隨流水半成塵  
淡煙芳草長千路  
作意能來有幾人

邀方員外看花

楊基

金昌亭西萬株花  
臘脂玉雪爭紛拏  
春風攜酒看花去  
騎馬徑到山人家  
花深樹密無徑入  
下馬徘徊暎花立  
紫萼風微翠袖香  
紅絲露重烏巾濕  
別來幾負看花期  
客裏怱怱見一枝  
白下橋邊寒食後  
廣陵城外綠陰時  
今年花最逢春早  
准擬清樽對花倒  
人意方邀酒伴來  
花枝已向東風老  
花雖漸老仍堪折  
猶勝紛紛滿蹊雪  
且共芙蓉幕裏人  
坐看海棠枝上月

賣花篇

明  
黃德水

日南氣候天下奇，四序皆如三月時。  
邠風謾賦爲裘什，越俗空傳采葛詩。  
泉甘土沃山川美，長日花開爛於綺。  
不論秋去有蘭蓀，寧獨春來盛桃李。  
初景瞳矐萬戶開，熒童駱驛賣花來。  
一筐新藥朝纔摘，數種奇葩歲自栽。  
曲房小閣開妝奩，紫貝青蛱走輕塵。  
若箇簾前飛墮英，誰家門外無殘葉。  
參珠間玉鬪光輝，踏青拾翠弄芳菲。  
花房剩有瑤臺露，滴盡儂家金縷衣。



五言律

和楊舍人詠中書省花樹

唐張文琮

華萼暎芳叢參差間早紅  
因風時落砌雜雨乍浮空  
影照鳳池水香飄雞樹風  
豈不愛攀折希君懷袖中

花底

唐杜甫

紫萼扶千藥黃鬚照萬花  
忽疑行幕雨何事入朝霞  
恐是潘安縣堪畱衛玠車  
深知好顏色莫作委泥沙

南池落花

唐羊士諤

蟬噪城溝水芙蓉忽已繁紅花迷越豔芳意過湘沅湛  
露宜清暑披香正滿軒朝朝祇自賞穠李亦何言

惜落花

唐

白居易

夜來風雨急無復舊花林枝上三分落園中二寸深日  
斜啼鳥思春盡老人心莫怪添杯飲情多酒不禁

賦得雨後花

唐

元稹

紅芳憐靜色深與雨相宜餘滴下纖蘂殘珠墜細枝沆  
花江上思啼粉鏡中窺念此低徊久風光幸一吹

贈子直花下

唐  
李商隱

池光忽隱牆花氣亂侵房  
屏綠蝶畱粉窗油蜂印黃  
官書推小吏侍史從清郎  
並馬更吟去尋思有底忙

晚春花

唐  
項斯

陰洞日光薄花開不及時  
當春無半樹經晚足空枝  
疎與香風會細將泉影移  
此中人到少開盡幾人知

題友人山花

唐  
方干

平明方盡拆為得好風吹  
不見移來日先愁落去時  
濃

香熏疊葉繁朵壓卑枝來看皆終夕遊蜂似有期

落花

唐李咸用

拾得移時看重思造化功如何飄麗景不似遇春風滿  
地餘香在繁枝一夜空祇應公子見先憶墜樓紅

賦得花影

明王偁

欲拂更紛紛空香寂不間亂迷芳蝶夢輕護錦苔紋襯  
月籠書幌因風颺舞裙莫移庭下步蹴碎一階雲

花殘

明蔣山卿

寂寂門空閉  
菲菲花欲殘  
賞心不相見  
對酒若爲歡  
小徑芳煙靄  
疎簾細雨寒  
一年春又謝  
惆悵思無端

延季居士種花詩

明王醇

誰能了空意  
因示數枝春  
色但隨根現  
花聊過眼新  
護香栽刺徧  
界緣委泉勻  
豈必來遊者  
方爲借翫人

五言排律

夏日裴尹員外西齋看花

唐楊巨源

笑向東來客  
看花枉在前  
始知清夏月  
更勝豔陽天  
露

濕呈妝汗風吹畏火燃蔥蘢和葉盛爛熳壓枝鮮紅彩  
當鈴閣清香到玉筵蝶棲驚曙色鶯語滯晴煙得地殊  
堪賞過時倍覺妍芳菲遲最好惟是謝家憐

花邨六韻

唐  
吳融

地勝非離郭花深故號邨已憐梁雪重仍愧楚雲繁山  
近當吟冷泉高入夢喧依稀小有洞邂逅武陵源月好  
頻依座風輕莫閉門流鶯更多思百轉待黃昏

賦落花以宋元憲金谷樓危到地香得香字

明  
劉承直

英華本天性開謝任年光自是春風改  
那因夜雨傷低徊飄綺席荏苒度雕牆  
翠霧當窗合紅雲匝地香點泥登燕壘  
添蜜入蜂房剪綵誇西苑成妝詫壽陽  
角哀翻塞曲徑遠誤漁郎但使靈根在  
重看錦樹芳

六言律

落花

唐  
李中

殘紅引動詩魔懷古牽情奈何半落銅臺月  
曉亂飄金

谷風多悠悠旋逐流水片片輕粘短莎誰見長門深鎖  
黃昏細雨相和

七言律

山花

唐錢起

山花照塢復燒谿樹樹枝枝盡可迷野客未來枝畔立  
流鶯已向樹邊啼從容只是愁風起眷戀常須向日西  
別有妖妍勝桃李攀來折去亦成蹊

西省對花憶忠州東坡新花樹因寄題東樓



唐  
白居易

每看闕下丹青樹  
不忘天邊錦繡林  
西掖垣中今日眼  
南賓樓上去年心  
花含春意無分別  
物感人情有淺深  
最憶東坡紅爛熳  
野桃山杏水林檎

闔閭城北有賣花翁  
討春之士往往造焉  
因招

襲美

唐  
陸龜蒙

故城邊有賣花翁  
水曲舟輕去盡通  
十畝芳菲爲舊業  
一家煙雨是元功  
閒添藥品年年別  
笑指生涯樹樹紅

若要見春歸處所不過攜手問東風

魯望以花翁之什見招因次韻酬之

唐  
皮日休

九十攜鋤偃僂翁小園幽事盡能通  
斲烟栽藥爲身計負水澆花是世功  
婚嫁定期杉葉紫蓋藏應待桂枝紅  
不知家道能多少只在勾芒一夜風

對花

唐  
秦韜玉

長與韶光暗有期可憐蜂蝶却先知  
誰家促席臨低樹

何處橫釵戴小枝麗日多情疑曲照和風得路合偏吹  
向人難道渾無語笑勸王孫到醉時

惜花

唐

李建勲

淡淡西園日又垂一樽何忍負芳枝莫言風雨長相促  
直是清明得幾時心破只愁鶯踐落眼穿唯怕客來遲  
年年使我成狂叟腸斷紅箋幾首詩

玉堂栽花周正孺有詩次其韻

宋

蘇軾

故山桃李半荒榛  
粗報君恩便乞身  
竹簟暑風招我老  
玉堂花藥為誰春  
纖纖翠蔓詩催發  
皎皎霜葩鬢鬪新  
只有來禽青李帖  
他年畱與學書人

看花

宋曾鞏

春來日日探花開  
紫陌看花始此回  
欲賦妍華無健筆  
擬酬芳景怕深杯  
但知抖擻紅塵去  
莫問翦鬢白鬢催  
更老風情轉應少  
且邀佳客試徘徊

落花

元郝經

彩雲紅雨暗長門翡翠枝餘萼綠痕桃李東風蝴蝶夢  
關山明月杜鵑魂玉闌煙冷空千樹金谷香銷謾一尊  
狼藉滿庭君莫掃且畱春色到黃昏

花信

元黃潛

已覺尋芳去較遲千林紅紫總紛披幾經夜雨能無恙  
試問春風竟不知斜日遊蜂應有夢野亭立馬已多時  
殷勤却是江南客曾擘冰霜寄一枝

賣花聲

元謝宗可

春光叫徧費千金紫韻紅腔細細吟幾處又驚遊冶夢  
誰家不動惜芳心暗穿紅霧樓臺曉清逐香風巷陌深  
妝鏡美人聽未了繡簾低揭畫簷陰

春半採花

元洪希文

芳菲著雨便成苔問訊東君幾日回  
閨月不曾花下去今朝偶到樹邊來  
幾何間闊鶯偏老如此生疎蝶也猜  
流水時光容易過舉頭枝上已青梅

落花詩

明沈周

飄飄蕩蕩復悠悠樹底追尋到樹頭  
趙武泥塗知辱雨  
秦宮脂粉惜隨流  
癡情戀酒粘紅袖  
急意穿簾泊玉鈎  
欲拾殘芳擣為藥  
傷春難療箇中愁

其二

夕陽無賴小橋西  
春事闌珊意亦迷  
錦里門前谿好浣  
黃陵廟裏鳥還啼  
焚追螺甲教香史  
煎帶牛酥囑膳娛  
萬寶千鈿真可惜  
歸來直欲滿筐攜

花蕊

明  
朱之蕃

交枝低亞藥紛披舞影飄香化日遲紅頰曉酣微困酒  
粉痕宵褪苦搜詩追從蜂蝶應難定倦聽笙歌有所思  
尋徧天涯芳草路三生石上月明時

落花

朱之蕃

春宵花月照春江瀉影流香繞客艘廣野芳魂招不得  
一天愁緒總難降啄餘燕嘴歸高棟粘向蜂鬚入小窗  
燈下簾垂寂無語似隨紅燼墜銀缸

其二



催花遣使憶新銜  
又報春歸燕語喃  
園月和煙霏曲徑  
江風帶雨灑孤帆  
亂飄不羨吳姬舞  
遠寄無勞驛使緘  
藉坐錦茵新釀熟  
待嘗櫻笋試羅衫

種花

明  
李流芳

為園數畝未言賒  
鑿沼疏泉手灌花  
花欲疎疎仍密密  
枝須整整復斜斜  
漸看節序皆芳候  
不放風光到別家  
最愛南榮冬日暖  
蠟梅一樹映山茶

五言絕句

贈李十四

唐王勃

小徑偏宜草空庭不厭花平生詩與酒自得會仙家

其二

亂竹開三徑飛花滿四隣從來揚子宅別有尚玄人

林塘懷友

王勃

芳屏畫春草仙杼織朝霞何如山水路對面即飛花

題鑒上人房

唐宋之問

落花雙樹積芳草一庭春翫之堪興盡何必見幽人

喜入長安

唐  
崔湜

雲物能催曉風光不惜年  
賴逢征路盡歸在落花前

玉真公主山居

唐  
儲光義

山北天泉苑山西鳳女家  
不言沁園好獨隱武陵花

江南曲

儲光義

日暮長江裏相邀歸渡頭  
落花如有意來去逐船流

河上逢落花

唐  
萬楚

河水浮落花花流東不息應  
見浣紗人為道長相憶

送子壻往揚州

唐 劉長卿

半邏鶯滿樹新年人獨還  
落花逐流水共到茱萸灣

代人乞花

唐 李益

繡戶朝眠起開簾滿地花  
春風解人意吹落妾西家

花島

唐 韓愈

蜂蝶去紛紛香風隔岸聞  
欲知花島處水上覓紅雲

花源

韓愈

源上花初發公應日日來  
丁寧紅與紫慎勿一時開

惜花

唐  
張籍

山中春已晚處處見花稀  
明日來應盡林間宿不歸

酬范侍御

唐  
鮑溶

玉管傾杯樂春園鬪草情  
野花無限意處處逐人行

其二

相勸醉年華莫醒春日斜  
春風宛陵道萬里晉陽花

惜花

唐  
施肩吾

落盡萬株紅無人解繫風  
今朝芳徑裏惆悵錦機空

高花

唐 李商隱

花將人共笑  
籬外露繁枝  
宋玉臨江宅  
牆低不礙窺

雜題

唐 司空圖

孤枕聞鶯起  
幽懷獨悄然  
地融春力潤  
花泛曉光鮮

賞殘花

唐 紇干著

零落多依草  
芳香散著人  
低簷一枝在  
猶占滿堂春

月夜汎舟

唐 僧法振

西塞長雲盡  
南湖片月斜  
汎舟人不見  
卧入武陵花

雙池

宋蘇軾

沂流入城郭，疊疊渡千家。不見雙池水，長漂十里花。

花塢

宋文同

繚繞穿紅萼，爛斑踏紫苔。誰將錦步障，端為使君開。

花

明張羽

能白更兼黃，無人亦自芳。寸心原不大，容得許多香。

落花

明薛蕙

今朝捲簾坐，時見一花飛。不惜芳菲盡，春風稍稍稀。

六言絕句

山居樂

明  
李言恭

一徑香無車馬萬山忽有人家相問不知歲月惟見開  
花落花

七言絕句

惜花

唐  
郭震

豔拂衣襟藥拂杯  
遶枝閒共蝶徘徊  
春風滿目還惆悵  
半欲離披半未開



宴春源

唐  
王昌齡

源向春城花幾重  
江明深翠引諸峯  
與君醉失松谿路  
山館寥寥傳暝鐘

西廵歌

唐  
李白

水綠天青不起塵  
風光和暖勝三秦  
萬國煙花隨玉輦  
西來添作錦江春

江畔獨步尋花

唐  
杜甫

江深竹靜兩三家  
多事紅花映白花  
報答春光知有處

應須美酒送生涯

送王卿

唐  
韋應物

別酌春林啼鳥稀  
雙旌背日晚風吹  
却憶回來花已盡  
東郊立馬望城池

贈張千牛

唐  
韓翃

蓬萊闕下是天家  
上苑新回白鼻騮  
急管畫催平樂酒  
春衣夜宿杜陵花

河中府崇福寺看花

唐  
盧綸

聞道山花如火紅  
平明登市已經風  
老僧無見亦無說  
應與看人心不同

殘花

唐楊凝

五馬踟躕在路岐  
南來只爲看花枝  
鶯銜蝶弄紅芳盡  
此日深閨那得知

和陳閣老當直從東省過史館看花

唐權德輿

畫漏沈沈倦瑣闌西垣東觀闌芳菲繁花滿地似畱客

應爲主人休澣歸

同諸公夜宴監軍翫花之作

唐 武元衡

五侯門館百花繁  
紅燭搖風白雪翻  
不似鳳凰池畔見  
飄揚今隔上林園

看花

唐 羊士諤

一到花間一忘歸  
玉杯瑤瑟減光輝  
歌筵更覆青油幕  
忽似朝雲瑞雪飛

送廖叅謀東遊

唐 劉禹錫

九陌逢君又別離  
行雲別鶴本無期  
望嵩樓上忽相見  
看過花開花落時

詔追赴都

唐柳宗元

十一年前南渡客  
四千里外北歸人  
詔書許逐陽和至  
驛路開花處處新

落花

唐韓愈

已分將身著地飛  
那羞踐踏損光輝  
無端又被春風誤  
吹落西家不得歸

風折花枝

韓愈

浮豔侵天難就看  
清香撲地只遙聞  
春風也是多情思  
故棟繁枝折贈君

遊太平公主山莊

韓愈

公主當年欲占春  
故將臺榭壓城闌  
欲知前面花多少  
直到南山不屬人

登科後

唐孟郊

昔日齷齪不足誇  
今朝放蕩思無涯  
春風得意馬蹄疾

一日看遍長安花

九華觀看花

唐  
張籍

街西無數閒遊處不似九華仙觀中  
花裏可憐池上景  
幾重牆壁貯春風

山中主人

唐  
楊巨源

十里青山有一家翠屏深處又添霞  
若為說得谿中事  
錦石和煙四面花

春晚遊鶴林寺

唐  
李涉

野寺尋花春已遲  
背巖唯有兩三枝  
明朝攜酒猶堪賞  
為報春風且莫吹

衡州夜後把火看花畱客絕句

唐呂溫

紅芳暗落碧池頭  
把火遙看且少畱  
半夜忽然風更起  
明朝不復上南樓

伏翼西洞送人

唐陳羽

洞裏春晴花正開  
看花出洞幾時回  
殷勤好去武陵客



莫引世人相逐來

宮詞

唐

王建

五更三點索金車  
盡放宮人出看花  
仗下一邊催立馬  
殿頭先報內園家

于主簿廳看花

王建

小葉稠枝粉壓堆  
暖風吹動鶴翎開  
若無別事為畱滯  
應便拋家宿看來

看花屋

唐

白居易

忽驚暎樹新開屋却似當簷故種花可惜年年紅似火  
今春始得屬元家

惜落花贈崔二十四

白居易

漠漠紛紛不奈何狂風急雨兩相和晚來悵望君知否  
枝上稀疏地上多

別種東坡花樹

白居易

花林好住莫顛顚春至但知依舊春樓上明年新太守  
不妨還是愛花人

僧院花

白居易

欲悟色空為佛事故栽芳樹在僧家  
細看便是華嚴偈  
方便風開智慧花

花栽

唐元稹

買得山花一兩栽  
離鄉別土易摧頽  
欲知北客居南意  
看取南花北地來

宮詞

唐王涯

春風擺蕩禁花枝  
寒食鞦韆滿地時  
又落深宮石渠裏

盡隨流水入龍池

題郵亭殘花

唐張祜

雲暗山橫日欲斜  
郵亭下馬對殘花  
自從身逐征西府  
每到花時不在家

同友人看花

唐朱慶餘

尋花不問春深淺  
縱是殘紅也入詩  
每箇樹邊行一帀  
誰家園裏最多時

春日餐霞閣

唐施肩吾

灑水初晴物候新  
餐霞閣上最宜春  
山花四面風吹入  
為我鋪牀作錦茵

觀葉生畫花

施肩吾

心竅玲瓏貌亦奇  
榮枯只在手中移  
今朝故向霜天裏  
點破繁花四五枝

念昔遊

唐杜牧

李白題詩水西寺  
古木回巖樓閣風  
半醒半醉遊三日  
紅白花開山雨中

春晚題韋家亭子

杜牧

擁鼻侵襟花草香  
高臺春去恨茫茫  
薦紅半落平池晚  
曲渚飄成錦一張

和嚴憚秀才落花

杜牧

共惜流年畱不得  
且環流水醉流杯  
無情紅豔年年盛  
不恨凋零却恨開

過南隣花園

唐  
雍陶

莫怪頻過有酒家  
多情長是惜年華  
春風堪賞還堪恨

纔見開花又落花

過舊宅看花

雍陶

山桃野杏兩三栽  
樹樹繁花去復開  
今日主人相引看  
誰知曾是客移來

惜花

唐  
方干

可憐妍豔正當時  
剛被狂風一夜吹  
今日流鶯來舊處  
百般言語殢空枝

詠花

方干

狂心醉眼共徘徊一半先開笑未開此日不能偷折去  
胡蜂直恐越人來

賣花謠

唐  
來鵬

紫豔紅苞價不同市街羅列起香風無言無語呈顏色  
知落誰家池館中

山路見花

唐  
崔櫓

曉紅初拆露香新獨立空山冷笑人春意自知無主惜  
恁風吹逐馬蹄塵



文昌寓直

唐  
鄭谷

何遜空階夜雨平  
朝來交直雨新晴  
落花亂下花磚上  
不忍和苔踏紫英

賣花翁

唐  
吳融

和煙和露一叢花  
擔入宮城許史家  
惆悵東風無處說  
不教閒地著春華

日高

唐  
韓偓

朦朧猶認管絃聲  
嗔痒餘寒酒半醒  
春暮日高簾半捲

落花和雨滿中庭

惜花

唐成彥雄

忘餐為戀滿枝紅  
錦帳頻移護曉風  
客散酒醒歸未得  
欄干獨立月明中

紅花

唐李中

紅花顏色掩千花  
任是猩猩血未加  
染出輕羅莫相貴  
古人崇儉戒奢華

晚春寄示茂才馮彭年

宋林逋

頭上酒巾為長物據梧微詠意無涯  
人生行樂知能幾  
但見春風滿路花

山邨

宋蘇軾

竹籬茅屋趁谿斜  
春入山邨處處花  
無象太平還有象  
孤煙起處是人家

再次韻答田國博部夫還

蘇軾

枝上稀疏地上稠  
忍看紅糝落牆頭  
風流別乘多才思  
歸趁西園秉燭遊

和予山種花

宋文同

風流從事李長家，遠徧官居種盡花。  
應為清才無比敵，擬將文彩競春華。

口號

文同

可笑陵陽太守家，閒無一事只栽花。  
已開漸落并纔發，長作亭中五色霞。

初秋行圃

宋楊萬里

小小園亭亦自佳，晚雲雨過却成霞。  
爛開梔子渾如雪。

已熟來禽尚帶花

晚春

宋  
戴復古

池塘渴雨蛙聲少  
庭院無人燕語長  
午枕不成春草夢  
落花風靜煮茶香

觀落花

宋  
翁卷

繞看豔蕾破春晴  
又見飛花點點輕  
縱是閒花自開落  
東風畢竟亦無情

宮詞

宋  
花藥夫人

春殿千官宴却歸上林鶯舌報花時  
宣徽旋進新裁曲  
學士爭吟應詔詩

山居

金元好問

詩腸搜苦怯茶甌  
信手拈書却枕頭  
簷溜滴殘山院靜  
碧花紅穗媚涼秋

曉發富陽縣

元方回

長山礮石片帆斜  
小雨初晴日眩沙  
回首遙看富陽縣  
青煙低罩一叢花

經歷司暮春卽事

元  
薩都拉

霞飛海燕拂簾過  
風捲魚鱗剪綠波  
閒倚石闌數春事  
滿池紅雨落花多

上陳達卿架閣

元  
袁士元

金猊香透小窗紗  
蓮幕歸來日未斜  
掩却竹扉清晝靜  
呼童汲水更澆花

元宮詞

明  
朱有燉

春日融和上翠臺  
芳池九曲似流杯  
合香殿外花如錦

不是看花不敢來

絕句

明董紀

小徑斜穿入竹林  
曲欄通轉亞花陰  
牆隈勢逼風如旋  
落地殘紅幾許深

客舍暮春

明徐淮

蜂兒釀蜜心方醉  
燕子營巢語未安  
閉戶不知春事老  
滿簾風雨落花寒

花答

明李禎



多謝天公著意栽不教妝點豔亭臺無人剪折無人賞  
贏得年年自在開

題畫雜花

明錢穀

淡白輕黃各鬪奇嫩紅殷紫總芳菲上林春色原無賴  
不斷生香惹客衣

殘花

明丘雲霄

昨日看花花滿枝今朝爛熳點青池無情莫抱東風恨  
作意開時是謝時

古寺尋花

明  
朝鮮女子

春深古寺燕飛飛  
深院重門客到稀  
我正尋花花盡落  
尋花還為惜花歸

御定佩文齋詠物詩選卷二百七十六

欽定四庫全書

御定佩文齋詠物詩選卷二百七十七

松類

五言古

附長短句

贈從弟

魏  
劉楨

亭亭山上松  
瑟瑟谷中風  
風聲一何盛  
松枝一何勁  
冰霜正慘悽  
終歲常端正  
豈不罹凝寒  
松柏有本性

寒松

梁  
沈約

梢聳振寒聲青蔥標暮色疎葉望崩齊喬幹凌雲直

詠寒松

梁范雲

修條拂層漢密葉障天潯凌風知勁節負雪見貞心

詠慈老磯石上松

梁吳均

根為石所蟠枝為風所碎賴我有貞心終凌細草華

應制賦銅鞮山松

北魏元勰

問松林松林經幾冬山川何如昔風雲與古同

詠松樹

隋李德林

結根生上苑擢秀邇華池歲寒無改色年長有倒枝露  
自金盤灑風從玉樹吹寄言謝霜雪貞心自不移

題張老松樹

唐  
宋之問

歲晚東巖下周顧何悽惻日落西山陰衆草起寒色中  
有喬松樹使我長歎息百尺無寸枝一生自孤直

石子松

唐  
儲光義

盤石青巖下松生盤石中冬春無異色朝暮有清風五  
鬣何人采西山舊兩童

南軒松

唐李白

南軒有孤松柯葉自綿冪清風無間時瀟灑終日夕陰  
生古苔綠色染秋煙碧何當凌雲霄直上數千尺

庭松

唐白居易

堂下何所有十松當我階亂立無行次高下亦不齊高  
者三丈長下者十尺低有如野生物不知何人栽接以  
青瓦屋承之白沙臺朝昏有風月燥濕無塵泥疎韻秋  
撼撼涼陰夏淒淒春深微雨夕滿葉珠蓑蓑歲暮大雪

天壓枝玉皚皚四時各有趣萬木非其儕去年買此宅  
多為人所咤一家二十口移轉就松來移來有何得但  
得煩襟開即此是益友豈必交賢才顧我猶俗士冠蓋  
走塵埃未稱為松主時時一愧懷

松聲

白居易

月好好獨坐雙松在前軒西南微風來潛入枝葉間蕭  
寥發為聲半夜明月前寒山颯颯雨秋琴泠泠絃一聞  
滌炎暑再聽破昏煩竟夕遂不寐心體俱脩然南陌車

贈賣松者

白居易

一束蒼蒼色知從澗底來  
斲掘經幾日枝葉滿塵埃  
不買非他意城中無地栽

西齋小松

唐元稹

松樹短於我清風亦已多  
況乃枝上雪動搖微月波  
幽姿得閒地詎感歲蹉跎  
但恐厦終構藉君當奈何

詠道上松

宋孔平仲



長松高落落積雪白皚皚鱗鬣凍且僵鬱結久不開觀  
其纏壓意直使同枯荻雁帶寒光去鳥傳春信來微陽  
入直榦生意忽已回豁若醉初醒整頓出塵埃秀色媚  
山腹孤標摩斗魁時至自當復安得長摧頽若非根本  
壯何能異草萊

同希顏怪松

金馮壁

崧高地氣靈花木競妍秀玉峯西南趾有松獨怪陋偃  
蹇如蝟螭奮迅如攫獸葉勁鬚髯張皮古鱗甲皺菌蟲

藤癭怒支離，筇節瘦月上虬影。  
搖風度雨聲驟，子落慰枯禪。  
枝樛礙飛鼉，盤根萬乘器。  
平蓋千歲壽，樵斤幸免辱。  
厦匠矧肯構，龍化會有時。  
天早期汝救。

樂山松

金劉從益

樂山一何崇，上有千歲松。  
清孤月露底，秀拔天地中。  
蒲柳抱常質，桃李開芳容。  
爭如十八公，笑傲冰霜風。  
居然喜避世，不肯汙秦封。  
蟠如北海螭，伏如南陽龍。  
紛紛過者多，匠石終不逢。  
明堂幾時構，喚起蒼髯翁。

種松

元劉因

萬牛來丘山大厦高崔嵬當年誰苦辛遺此千歲材手  
持百松子與之俱傾頽殷勤囑造物為護荒山隈今來  
見豪末喜溢蒼煙堆十年望根立百年排風雷自此千  
萬年再見明堂開東家十年計戢戢千頭栽豈不早有  
望求此良悠哉

題松雲齋十五韻

元葉顥

青松如舞蛟白雲如遊龍龍遊化甘霖與世為年豐蛟

舞散清影利爪拏高穹二者無限奇盡入幽人宮幽人  
室懸磬隱約松雲中松秀悅耳目雲生盪心胸讀書坐  
雲石鼓琴雜松風無往不自得深喜世慮空披雲採松  
花何啻食萬鍾萬鍾食有盡松花味無窮松雲幸無恙  
天地同始終扶筇一相顧摩雲撫孤松問松幾何年適  
與雲會同松靜了不言雲去尋無蹤回首萬峯頂但見  
山重重

松壑

明  
袁凱

矯矯千歲姿生此衆石間微颺度巖阿殷殷起波瀾幽  
人一壺酒日夕自怡顏安得川上舟與子相往還

聽松

明邵寶

聽松復聽松松聲在高閣閣成四十年聽者今如昨風  
來春濤生風去秋濤落當其無風時蕭然亦微作聰者  
聽於斯冥心對寥廓

松下居

明僧宗泐

我此松下居即事良可悅閉戶畱白雲開軒放明月松

響風忽來泉流雨初歇時有西齋人相親默無說

七言古

附長短句

靈谿老松歌

唐

盧士衡

靈谿古觀壇西角千尺鱗皴棟梁樸橫出一枝憂樓閣  
直上一枝掃寥廓白日蒼苔擁根脚月明風撼寒光落  
有時風雨晦暝擺撼若黑龍之騰躍合生於象外峯巒  
枉滯乎人間山岳安得巨靈授請託拔向青桂白榆邊  
安著

小松歌

唐  
李咸用

幽人不喜凡草生  
秋鋤斨得寒青青  
庭閒土瘦根脚獐  
風搖雨拂精神醒  
短影月斜不滿尺  
清聲細入鳴蛩夕  
天人戲剪蒼龍髯  
參差簇在瑤階側  
金精水鬼欺不得  
長與東皇逞顏色  
勁節暫因君子移  
貞心不為麻中直

松障圖歌

元  
陳泰

何人獨立身堂堂  
十八公子鬚髯蒼  
凝冰不遣勢摧折  
清籟時與髯低昂  
蘭為兄兮雪為友  
燕坐松間自呼酒

眼花耳熱鱗鬣生千尺龍蛇入揮手手中松月自離筆  
已見雲煙生翦鬱倘非白晝堂宇空真恐幽陰鬼神出  
平生始識顏平原堅苦絕勝甜中邊世間畫史千金價  
惜哉此松不多畫

賦得貞松壽姑蘇張繼孟八十

明  
劉溥

徂徠之松何蜿蜒根盤厚地枝摩天氣橫東南動光彩  
泰山風雪衡山煙長風吹天天宇開颯颯海濤天上來



世間草木總卑小如就彭祖觀嬰孩古來君子不改德  
松亦何嘗改其色往往工師求棟梁重如山岳誰移得  
春風細灑金粉香茯苓寒凝琥珀光為君取此製春酒  
飲之睂壽同無疆

五言律

松

唐  
李嶠

鬱鬱高巖表森森幽磎陲鶴棲君子樹風拂大夫枝百  
尺條陰合千年蓋影披歲寒終不改勁節幸君知

嚴鄭公階下新松得霑字

唐杜甫

弱質豈自負移根方爾瞻細聲聞玉帳疎翠近珠簾未  
見紫煙集虛蒙清露霑何當一百丈歌蓋擁高簷

松

唐陸肱

雪霜知勁質今古占嘉名斷砌盤根遠疎林偃蓋清鶴  
棲何代色僧老四時聲鬱鬱心彌久煙高萬井生

高松

唐李商隱

高松出衆木伴我向天涯客散初晴後僧來不語時有

風傳雅韻無雪試幽姿上藥終相待他年訪伏龜

廣德官舍二松

唐喻鳧

楊公休簿領二木日堅牢直甚彰吾節清終庇爾曹幽  
陰月裏細冷樹雪中高誰見干霄後枝飄白鶴毛

和李用夫栽小松

唐項斯

移來未換葉已勝在空山靜對心標直遙吟境助閒影  
侵殘雪際聲透小窗間即聳凌空榦脩脩豈易攀

題唐興寺小松

唐杜荀鶴

雖小天然別難將衆木同侵僧半窗月向客一襟風枝  
拂行苔鶴聲分叫砌蟲如今未堪看須待雪霜中

和薛侍御題興善寺松

唐許棠

何年斲到城滿國響高名半寺陰常匝鄰坊景亦清代  
多無朽勢風定有餘聲自得天然狀非同澗底生

移小松

唐張喬

松子落何年纖枝長水邊斲開新澗雪移出遠林煙帶  
月棲幽鳥無花灌冷泉微風動清韻閒聽罷琴眠

僧院松

唐 曹 松

此木韻彌全  
秋宵學瑟絃  
空知百餘尺  
未定幾年古  
甲磨雲拆孤  
根捉地堅  
何當拋一榦  
作蓋道場前

鄭轍補闕山松

唐 張 蠙

心將積雪欺  
根與白雲離  
遠寄僧猶憶  
高看鶴未知  
影交新長葉  
皴匝舊生枝  
多少同時種  
深山不得移

述松

唐 王貞白

遠谷呈材榦  
何由入棟梁  
歲寒虛勝竹  
功績不如桑  
秋

老落乾子春深裏嫩黃雖蒙匠者顧樵採日難防

松

唐僧無可

枝幹怪鱗皴烟梢出澗新屈盤高極目蒼翠遠驚人待  
鶴移陰過聽風落子頻青青寒木外自與九霄鄰

賦松

南唐謝仲宣

送人多折柳唯我獨吟松若保歲寒在何妨霜雪重森  
梢逢靜境廓落見孤峯還似君高節亭亭豈繼蹤

赤松詠

明傅汝舟

赤松五千丈一丈一雲生蛟龍分葉卧雷雨抱枝鳴陰  
好鶴長在巢居仙自營斲苓湏指夕輔取九丹成

松

明  
申時行

宛轉隨高阜青蔥結茂林團雲低蓋影挾雨送濤音節  
抱風霜苦根盤歲月深亦知弘景意山閣助清吟

五言排律

貢院樓北新栽小松

唐  
李正封

青蒼初得地華省植來新尚帶山中色猶含洞裏春近

樓依北戶隱砌淨游塵鶴壽應成蓋龍形未有鱗為梁  
資大厦封爵恥羸秦幸此觀光日清風屢得親

貢院樓北新栽小松

唐 錢衆仲

愛此凌霜操移來獨占春貞心初得地勁節始依人籠  
月煙猶薄當軒色轉新枝低無宿羽葉淨不留塵每與  
芝蘭近常慙雨露均幸因逢顧盼生植及茲辰

貢院樓北新栽小松

唐 吳武陵

拂檻愛貞容移根自遠峯曾經芳草沒終不住苔封葉



少初凌雪鱗生欲化龍  
乘春濯雨露得地近垣墉  
遂吹香微動含烟色漸濃  
時迴日月照為謝小山松

禁中春松

唐陸贄

陰陰清禁裏蒼翠滿春松  
雨露恩偏近陽和色更濃  
高枝分曉日靈韻雜宵鐘  
嵐助爐煙遠形疑葢影重  
願符千載壽不羨五株封  
倘得迴天眷全勝老碧峯

禁中春松

唐周存

幾歲含貞節青青紫禁中  
日華留偃蓋雉尾轉春風  
不

為繁霜改那將衆木同千條攢翠色百尺澹晴空影密  
金莖近花明鳳沼通安知幽澗側獨與散樗叢

禁中春松

唐常沂

暎殿松偏好森森列禁中攢柯沾聖澤疎葢引皇風晚  
色連秦苑春香滿漢宮操將貞石固材與直臣同翠影  
宜青瑣蒼枝秀碧空還知沐天眷千載更蔥龍

與楊十二巨源廬十九經濟同遊大安亭各賦

二物合為五韻探得石松

唐

元稹

片石與孤松曾經物外逢  
月臨棲鶴影雲抱老人峯  
蜀客君當問秦官我舊封  
積膏當琥珀新却長芙蓉待補  
蒼蒼去樛柯蚤變龍

中書相公任兵部侍郎日後閣植四松逾數年

澣忝此官因獻拙什

唐鄭澣

丞相當時植幽襟對此開  
人知舟楫器天假棟梁材  
錯落龍鱗出襜褕鶴翅迴  
重陰羅武庫細響靜山臺  
得地公堂裏移根澗水隈  
吳臣夢寐遠秦岳歲年摧  
轉覺飛

纓繆何因繼組來幾尋珠履跡願叱角弓培柏悅猶依  
社星高久照台後凋應共操無復問良媒

奉和四松

唐  
唐扶

幽抱應無語貞松遂自裁寄懷丞相業因擢大夫材日  
射蒼鱗動塵迎翠箒迴嫩茸含細粉初葉泛新杯偶聖  
為舟去逢時與鶴來寒聲連曉竹靜氣結陰苔赫奕鳴  
騶至熒煌洞戶開良辰一臨眺憇樹幾徘徊恨發風期  
阻詩從綺思裁還聞舊凋契凡在此中培

奉和四松

唐 劉禹錫

右相歷中台移松武庫栽紫茸抽組綬青實長玫瑰便有干霄勢看成構厦材數分天柱半影逐日輪迴舊賞台階去新知谷口來息陰長仰望翫意徘徊翠粒晴懸露蒼鱗雨起苔凝音助瑤瑟飄藥泛金罍月桂花遙燭星榆葉對開終湏似雞樹榮茂近昭回

奉和四松

唐 雍陶

右相歷兵署四松皆手栽斨時驚鶴去移處帶雲來根

倍雙桐植花分八桂開生成造化力長作棟梁材豈羨  
蘭依省猶嫌柏占臺出樓終百尺入夢已三台幽韻和  
宮漏餘香度酒杯拂冠枝上雪染履影中苔高位相承  
地新詩寡和才何由比羅蔓攀附在條枚

文宣王廟古松

唐  
李 胄

列植成均裏分行古廟前陰森非一日蒼翠自何年寒  
影煙霜暗晨光枝葉妍近簷陰更靜臨砌色相鮮每愧  
聞鐘磬多慚接豆籩更宜教胄子於此學貞堅

七言律

松

唐  
李山甫

地聳蒼龍勢抱雲  
天教青共衆材分  
孤標百尺雪中見  
長嘯一聲風裏聞  
桃李傍他真是佞  
藤蘿攀爾亦非羣  
平生相愛應相識  
誰道修篁勝此君

題子姪書院雙松

唐  
曹唐

自種雙松費幾錢  
頃令院落似秋天  
能藏此地新晴雨  
却惹空山舊燒煙  
枝壓細風過枕上  
影籠殘月到窗前

莫教取次成閒夢使汝悠悠十八年

題淨衆寺古松

唐崔塗

百尺森疎倚梵臺昔人曾見此初栽故園未有偏堪戀  
浮世如閒即合來天暝豈分蒼翠色歲寒應識棟梁材  
清陰可惜不駐得歸去暮城空首回

松

唐韓溉

倚空高檻冷無塵往事閒徵夢欲分翠色本宜霜後見  
寒聲偏向月中聞啼猿想帶蒼山雨歸鶴應和紫府雲



莫向東園近桃李春光還是不容君

題吉水縣廳前新栽小松

唐李中

斲開幽澗蘚苔斑移得孤根植砌前影小未遮官舍月  
翠濃猶帶舊山煙羣花解笑香寧久衆木雖高節不堅  
輸我婆娑欄檻內晚風蕭颯學幽泉

松

唐  
炙轂子

寒松聳拔倚蒼岑綠葉扶疎自結陰丁固夢時還有意  
秦皇封日豈無心常將正節棲孤鶴不遣高枝宿衆禽

好是特凋羣木後護霜凌雪翠逾深

龍形松

元謝宗可

夭矯擎雲海上來蜿蜒虺骨老莓苔紫髯夜濕千山雨  
鐵甲春生萬壑雷影動欲翻平陸起聲號如卷怒潮迴  
蜷枝冷挂巖前月猶似擎珠照九垓

羅漢松

明屠隆

何年蒼叟住禪林百尺婆婆萬壑陰四果總來成佛印  
一官應不受秦侵靈根歲月跼趺久老榦風霜面壁深

謾謾回飈響空谷猶聞清夜海潮音

七言排律

遙同蔡起居偃松篇

唐張說

清都衆木總榮芬傳道孤松最出羣  
名接天庭長景色氣連宮闕借氛氲  
懸池的的停華露偃蓋重重拂瑞雲  
不惜流膏助仙鼎願將楨幹奉明君  
莫比冥靈楚南樹朽老江邊代不聞

五言絕句

松下雪

唐錢起

雖因朔風至不向瑤臺側惟助苦寒松偏明後凋色

千松嶺

唐顧況

終日吟天風有時天籟止問渠何旨意恐落凡人耳

四望驛松

唐王建

當初此間別直至此庭中何意聞聲耳聽他枝上風

小松

王建

小松初數尺未有直生枝間即傍邊立看多長却遲

題翰林院東閣小松

唐元稹

簷礙修鱗亞霜侵簇翠黃惟餘入琴韻終待舜絃張

乳毛松

唐鄭谷

松格一何高何人號乳毛霜天寓直夜愧爾伴閒曹

松

宋徐鉉

細韻風中遠寒青雪後濃繁陰堪避雨効用待東封

松

金李俊民

鬱鬱愁無地青青獨有心疑從大夫後傾蓋到如今

七言絕句

憑韋少府班覓松樹子栽

唐 杜甫

落落出羣非櫟柳青青不朽豈楊梅  
欲存老蓋千年意為覓霜根數寸栽

酬道芬寄畫松

唐 劉商

聞道松花學沈寧寒枝浙瀝葉青青  
一株將比囊中樹若箇年多有茯苓

松樹

唐 白居易

白金換得青松樹君既先栽我不栽幸有西風易憑仗  
夜深偷送好聲來

省中題新植雙松

唐賈島

端坐高宮起遠心雲高水闊共幽沈更堂寓直將誰語  
自種雙松伴夜吟

采松花

唐姚合

擬服松花無處學嵩陽道士忽相教朝來試上高枝采  
不覺翻傾仙鶴巢

小松

唐

章孝標

爪葉鱗條龍不盤梳風幕翠一庭寒莫言只似人長短  
須作浮雲向上看

書院二小松

唐

李羣玉

一雙幽色出凡塵數粒秋煙二尺鱗從此靜窗聞細韻  
琴聲長伴讀書人

小松

唐

杜荀鶴

自小刺頭深草裏而今漸覺出蓬蒿時人不識凌雲木



直待凌雲始道高

澗松

唐  
崔塗

寸寸凌霜長勁條  
路人猶笑未干霄  
南園桃李雖堪羨  
爭奈春殘又寂寥

題僧院松

唐  
曹松

空山澗畔枯松樹  
禪老堂頭鱗甲身  
傳是昔朝僧種著  
下頭應有茯苓神

松嶺

唐  
陸希聲

嶺上春松手自栽已能蒼翠映莓苔  
歲寒本是家君事好送清風月下來

松

唐成彥雄

大夫名價古今聞  
盤屈孤貞更出羣  
將謂嶺頭閒得了  
夕陽猶挂數枝雲

華山孤松

唐張蠩

石罅引根非土力  
冒寒猶助嶽蓮光  
綠槐生在膏腴地  
何得無心拒雪霜

畫松

唐  
僧景雲

畫松一似真松樹且待尋思記得無曾在天台山上見  
石橋南畔第三株

江路聞松風

金  
趙可


雪裏雲山玉作屏松風入耳細泠泠朝來醉著江亭酒  
却被髯龍喚得醒

靜芳亭

元  
袁桷

簾外羣山當畫屏白雲如水度中庭松花落徑無人掃

失却莓苔一半青



御定佩文齋詠物詩選卷二百七十七

# 欽定四庫全書

集部

御定佩文齋詠物詩選卷二百

李全  
十八

詳校官侍郎<sub>臣</sub>李封

主事銜<sub>臣</sub>徐以坤覆勘

總校官檢討<sub>臣</sub>

何思鈞

校對官典簿<sub>臣</sub>

郭祚熾

謄錄監生<sub>臣</sub>

潘炯

欽定四庫全書

御定佩文齋詠物詩選卷二百七十八

柏類

五言古

庭柏

北齊

魏收

古松圖偃蓋新柏寫爐峯凌寒翠不奪迎暄綠更濃  
茹葉輕沈體咀實化衰容將使中臺屬違山能見從

雙柏

元

陳樵

亭亭山上柏柯榦如青銅蒼古拔俗姿肯作兒女容風  
霜日搖落萬木為之空爾獨不見摧屹立如老翁乃知  
歸根妙生意恒內融願乘雷雨興化作雙飛龍

柏屏

明  
顧璘

壁立青玉屏下見古柏根相憐歲寒葉鬱作蒼雲屯貞  
姿洗霜雪老氣橫乾坤名園非此種誰可當君門

七言古

古柏行

唐  
杜甫

孔明廟前有老柏柯如青銅根如石霜皮溜雨四十圍  
黛色參天二千尺君臣已與時際會樹木猶為人愛惜  
雲來氣接巫峽長月出寒通雪山白憶昨路繞錦亭東  
先主武侯同閔宮崔嵬枝幹郊原古窈窕丹青戶牖空  
落落盤踞誰得地冥冥孤高多烈風扶持自是神明力  
正直原因造化功大厦如傾要梁棟萬牛回首丘山重  
不露文章世已驚未辭剪伐誰能送苦心豈免容螻蟻  
香葉終經宿鸞鳳志士幽人莫怨嗟古來材大難為用



五言律

使院中新栽柏樹子呈李十五栖筠

唐岑參

愛爾青青色移根此地來不曾臺上種畱向磧中栽翠  
葉欺門柳狂花笑院梅不須愁歲晚霜露豈能摧

穗柏聯句

唐段成式

一院暑難侵莓苔共影深標枝爭息鳥餘吹正開襟成式  
宿雨香添色殘陽石在陰乘閒動詩意助靜入禪心張希復

古柏

唐  
李洞

手植知何代，年齊偃蓋松。  
結根生別樹，吹子落鄰峯。  
古幹經龍嗅，高烟過雁衝。  
可知繁葉盡，聲不礙秋鐘。

五言絕句

柏栢軒

明  
高啟

清陰護燕几，中有忘言客。  
人來問不應，笑指庭前柏。

七言絕句

武侯廟古柏

唐  
雍陶

宿葉四時同一色高枝千歲對孤峯此中疑有精靈在  
為見盤根是卧龍

題龍興寺老柏院

宋張在

南鄰北舍牡丹開年少尋芳去又迴惟有君家老柏樹  
春風恰似不曾來

禹柏圖

元吳師道

柏貢荊州任土風漢陽遺樹尚蔥龍休誇此是親曾植  
四海青青盡禹功



御定佩文齋詠物詩選卷二百七十八

欽定四庫全書

御定佩文齋詠物詩選卷二百七十九

檜類

五言古

濟南廟中古檜同叔能賦

金元好問

亭亭祠宮檜鬱鬱上雲雨扶持幾來年造物心獨苦青  
餘玉川潤根入鐵岸古雖含棟梁姿斤斧安得取沈湮  
地中久駭浪思一鼓天柱屹不移水國奠平土乾坤此

神物甲乙存世譜  
瀨鄉畱耳孫  
闕里傳鼻祖  
秦松徒自汙  
蜀柏聊共數  
會待十抱成  
茲焉重摩拊

長短句

致道觀看七星檜樹歌

明孫一元

海雲山前突兀見  
古檜眼中氣勢相  
盤拏上應七曜分  
布有神會地靈  
千歲儲英華  
皴皮無文盡  
駁落老根化  
石吞泥沙  
據山嵒嵒  
映壑谿  
斲身枯  
溜雨枝  
黑藏蛇  
佇立頃刻  
雲霧遮  
日落未  
落山之  
厓同行  
觀者皆  
歎嗟舌

捫頸縮無敢譁歸來靈物不可究夜宿撼牀恐龍闕

五言律

畫檜

元虞集

茅山多古樹此檜更長生  
鶴鶴棲來穩蛟龍化得成  
雲深還近戶月落似聞笙  
千載如相見蒼然故舊情

七言律

謝寺雙檜

唐劉禹錫

雙檜蒼然古貌奇含煙吐霧鬱參差  
晚依禪客當金殿



初耐將軍映畫旗  
龍象界中成寶蓋  
鴛鴦瓦上出高枝  
長明燈是前朝焰  
曾照青青年少時

法雲雙檜

唐

溫庭筠

晉朝名輩此離羣  
想對濃陰去住分  
題處尚尋王內史  
畫時應是顧將軍  
長廊夜靜聲疑雨  
古殿秋深影似雲  
一下南臺到人世  
曉泉清籟更難聞

檜樹

唐

秦韜玉

翠雲交幹瘦輪囷  
嘯雨吟風幾百春  
深蓋屈盤青壓尾

老皮張展黑龍鱗  
惟堆寒色資琴興  
不放秋聲染俗塵  
歲月如波事如夢  
竟畱蒼翠待何人

陳檜

明馬弓

古本凌空百尺過  
根盤如石鐵為柯  
濃陰不礙金蓮座  
虛籟猶傳玉樹歌  
倦客解衣頻徙倚  
老禪卓錫定摩挲  
雲門寺裏梁朝柏  
身上苔痕想更多

檜

明章珪

天挺良材聳百尋  
托根仙宿歷年深  
能兼老柏冰霜操

不讓寒梅鐵石心  
夜靜繞壇星布列  
月明滿地翠陰森  
工師若選明堂用  
為棟為梁價萬金

五言絕句

檜和子由

宋

蘇軾

依依古松子  
鬱鬱綠毛身  
每長須成節  
明年漸庇人

七言絕句

自遣詩

唐

陸龜蒙

花瀨濛濛紫氣昏  
水邊山曲更容村  
終須揀取幽棲地

老檜成雙便作門

和重元寺雙矮檜

陸龜蒙

可憐煙刺是青螺如到雙林誤禮多  
更憶早秋登北固海門蒼翠出晴波

醒聞檜

唐皮日休

解洗餘醒晨半酒星星仙吹起雲門耳  
根莫厭聽佳木會盡山中寂靜源

重元寺雙矮檜

皮日休

撲地枝回是翠鈿  
碧絲籠細不成煙  
應如天竺難陀寺  
一對狡獬相枕眠

題法雲寺雙檜

唐方壺居士

謝郎雙檜綠於雲  
昏曉濃陰色未分  
若並毫宮仙廡跡  
定知高峭不如君

古檜

元虞集

根到深泉石作身  
踈踈香葉不知春  
海波不動天風遠  
千歲寒蛟作老人



御定佩文齋詠物詩選卷二百七十九

欽定四庫全書

御定佩文齋詠物詩選卷二百八十

杉類

五言古

郡齋移杉

唐

韋應物

摧幹方數尺幽姿已蒼然結根西山寺來植郡齋前  
新含野露氣稍靜高窗眠雖為賞心遇豈有巖中緣

栽杉

唐

白居易



勁葉森利劒孤莖挺端標纔高四五尺勢若干青霄移  
栽東窗前愛爾寒不凋病夫卧相對日夕閒蕭蕭昨為  
山中樹今為簷下條雖然遇賞翫無乃近塵囂猶勝澗  
谷底埋沒隨衆樵不見鬱鬱松委質山上苗

長短句

古杉行

元  
范梈

丹陵觀有古杉屹如雙闕當雲門云是鍾君之手植君  
去此樹餘空邨尾搖翡翠捎八表根結蛇蛟行九原幽

邊豈無鬼神護深處直形天地恩一方拆裂引穿溜猶  
是百年燒火痕蒼皮樹裏漸欲合始知草木有道存或  
云下有丹火伏四時地底皆春溫神還復壯此其驗疑  
是自此無傳喧平生政坐嗜奇古來看適值寒冬昏長  
歌沈思繞其下夜半月高松露繁飄飄葉縣見鳥影牢  
落豐城龍劍魂何當喚起博物者共騎黃鶴凌崑崙

七言絕句

題中峯杉徑

宋  
朱子

盤回山腹轉修蛇橫入中峯小隱家好把穉杉緣徑插  
待迎涼月看清華

御定佩文齋詠物詩選卷二百八十

欽定四庫全書

御定佩文齋詠物詩選卷二百八十一

榆類

五言古

榆

明  
吳寬

始我種三榆近在亭之左  
西日待隱蔽陰成客能坐  
七年長漸高密葉已交鎖  
生錢聞可食貧者當果蓏  
其一  
忽惟悴嚙腹緣蟻螺持斧欲伐之  
材未中船舵藤蔓方

附麗不伐亦自可古人無棄物守圃常用跋

五言絕句

榆

宋張耒

修柯遇雲日老枿干虹霓嗟爾臃腫材大匠何見遺

七言絕句

貧居春怨

唐雍陶

貧居盡日冷風煙獨向簷牀看雨眠寂寞春風花落後  
滿庭榆莢似秋天

榆錢

宋 孔平仲

鏤雪裁綃箇箇圓日斜風定穩如穿憑誰細與東君說  
買住青春費幾錢

春晚

宋 僧道潜

疊穎叢條翠欲流午陰濃處聽鳴鳩兒童賭罷榆錢去  
狼藉春風漫不收

次韻答李揅之

明 王弼

摐桡爐頭擁薄綿嫩寒微雨暮春天不知詩思能多少

榆葉梨花已滿前

無題

明康栗

笑看海雲初起處  
吾家隱隱碧天隅  
何時跨鶴隨風去  
同與仙人坐白榆

御定佩文齋詠物詩選卷二百八十一

欽定四庫全書

御定佩文齋詠物詩選卷二百八十二

槐類

七言古

孔林瑞槐歌

元納延

闕里陰陰槐樹古百尺長柯挾風雨密葉盤空擁翠雲  
深根貫石流瓊乳蒼皮皴蝕紋異常天成篆籀分毫芒  
游絲縈錯科斗亂雲氣飛動龍鸞翔羸秦書焚士坑僂



幾歎遺經藏壁屋千年聖道復昭明  
喜見文章出嘉木  
神明元胄嗣上公雨露滋沐深培封清陰如水石壇靜  
彈琴樹底歌薰風

五言律

詠槐

唐  
李嶠

暮律移寒火春宮長舊栽  
葉生馳道側花落鳳庭隈  
烈士懷忠觸鴻儒訪業來  
何當赤墀下疎幹擬三台

七言律

槐花

唐羅鄴

行宮門外陌銅駝兩畔分  
栽此最多欲到清秋近時節  
爭開金蘂向闕河層樓寄恨  
飄珠箔駿馬憐香撼玉珂  
愁殺江南隨計者年年為爾  
剩奔波

宮槐

宋梅堯臣

漢家宮殿蔭長槐嫩色蔥蔥不染埃  
天仗龍旂穿影去  
鈎陳豹尾拂枝來青蟲挂後蜂銜子  
素月生來桂並栽  
我意方同杜工部冷淘惟喜葉新開

五言絕句

宮槐陌

唐王維

仄徑蔭宮槐幽陰多綠苔應門但迎掃畏有山僧來

宮槐陌

唐裴迪

門前宮槐陌是向歌湖道秋來山雨多落葉無人掃

槐

宋蘇軾

采擷殊未厭忽然已成陰蟬鳴看不見鶴立赴還深

罷直圖

明練子寧

草詔下金鑾宮槐白露寒紫駟馳不鞚明月在闌干

七言絕句

送人入蜀

唐  
楊凝

劒閣迢迢夢想間行人歸路繞梁山明朝騎馬搖鞭去  
秋雨槐花子午關

槐花

唐  
鄭谷

毵毵金葉撲晴空舉子心驚落照中今日老郎猶有恨  
昔年相謔十秋風

題槐

唐  
翁承贊

雨中妝點望中黃  
勾引蟬聲送夕陽  
憶得當年隨計吏  
馬蹄終日為君忙

谿陰堂

宋  
蘇軾

白水滿時雙鷺下  
綠槐高處一蟬吟  
酒醒門外三竿日  
臥看谿南十畝陰

軾以去歲春夏侍立邇英而秋冬之交子由相

繼入侍次韻絕句四首各述所懷

錄一

蘇軾

瞳瞳日脚曉猶清  
細細槐花暖欲零  
坐閱諸公平廊廟  
時看黃色起天庭

夏日田園雜興

宋 范成大

槐葉初勻日氣涼  
蔥蔥鼠耳翠成雙  
三公只得三枝看  
閒客清陰滿北窗

槐影

宋 許月卿

槐影本來惟戴日  
蟬聲固自未知秋  
斜陽薄雨羊歸徑

冷月橫星人倚樓

玉堂槐花

金趙秉文

玉堂陰合冷窗紗雨過銀泥引篆蝸  
萱草茂葵俱不見蜂聲滿院采槐花

玉堂閒適圖

元王惲

醉岸烏紗殿影東宮花低暎酒波紅  
興來草罷長楊賦獨占高槐灑晚風

即事

元趙孟頫

庭槐風靜綠陰多  
睡起茶餘日影過  
自笑老來無復夢  
閒看行蟻上南柯

庭槐

元 鄭允端

風轉庭槐拂檻開  
綠陰如染淨無埃  
婦人不作功名夢  
閒看南柯蟻往來

擬宮詞

明 袁宏道

百子池頭九子萍  
美人雙照月稜青  
宮槐葉落秋如水  
誦得蓮花兩卷經



御定佩文齋詠物詩選卷二百八十二

欽定四庫全書

御定佩文齋詠物詩選卷二百八十三

梧桐類

五言古

雙桐

魏明帝

雙桐生空井枝葉自相加  
通泉浸其根玄雨潤其柯

詠桐

齊王融

鸞鳳影層枝輕虹鏡展綠  
豈數龍門幽直慕瑤池曲

遊東堂詠桐

齊謝朓

孤桐北窗外高枝百尺餘葉生既婀娜葉落更扶疎無  
華復無實何以贈離居裁為珪與瑞足可命參墟

詠孤桐

梁沈約

龍門百尺時排雲少孤立分根蔭玉池欲待高鸞集

詠梧桐

沈約

秋還遽已落春曉猶未萎微葉雖可賤一剪或成珪

詠桐

隋魏澹

本求裁作瑟何用削成珪  
願寄華庭裏枝橫待鳳棲

答李伯魚桐竹

唐張說

結廬桐竹下室邇人相深  
接垣分竹徑隔戶共桐陰  
落花朝滿岸明月夜披林  
竹有龍鳴管桐畱鳳舞琴  
聲與高節非君誰賞心

桐竹贈張燕公

唐李伯魚

北竹青桐北南桐綠竹南  
竹林君早愛桐樹我初貪  
鳳棲桐不愧鳳食竹何慚  
棲食更如此餘非鳳所堪

段有廳孤桐

唐王昌齡

鳳凰所宿處月暎孤桐寒  
槁葉零落盡空柯蒼翠殘  
虛心誰能見直影非無端  
響發調尚苦清商勞一彈

題僧房雙桐

唐李頎

青桐雙拂日傍帶凌霄花  
綠葉傳僧磬清陰潤井華  
誰能事音律焦尾蔡邕家

梧桐

唐戴叔倫

亭亭南軒外貞幹修且直  
廣葉結青陰繁花連素色  
天

資韶雅性不愧知音識

題鮮于子駿桐軒

宋司馬光

朝陽升東隅照此庭下桐  
葦葦復萋萋居然古人風  
疎枝青玉簪密葉翠羽蒙  
午景凝餘清夕照畱殘紅  
雨響甍棟外風生戶牖中  
主人政多暇步賞幸從容  
終當致威鳳覽德鳴嚶嚶  
又將施五絃解慍歌帝宮

擬古

金張建

葦葦嶧山桐一樹十二枝  
枝分十二律所指各不移  
何

為師襄子獨謂東南奇一律不可缺一枝不可遺誰能  
以此意說似典樂夔

桐樹

明高啟

晴粉朝英隆涼瓊夏葉舒鳥啼高樹早蟬轉薄疏虛朱  
絃未薦曲彤管屢題詩坐恐銷華澤商吹起前除

洗桐

明王問

梧桐生高岡拳拳貽夏陰挹取葉上露為予洗其心有  
時藉槁君閒情寄徽音何以報爾德激泉濯朝林永日

影相對勿使塵浣侵

七言古

登樂陵臺倚梧桐望月有懷南臺李御史

元  
薩都拉

涼風吹墮梧桐葉  
瀉下泠泠露華白  
樂陵臺上悄無人  
獨倚梧桐看秋月  
月高當午桐陰直  
不覺衣霜露華濕  
此時却憶在金陵  
酒醒江樓聽秋笛

五言律



桐

唐李嶠

孤秀嶧陽岑亭亭出衆林春光雜鳳影秋月弄圭陰高  
暎龍門迴雙依玉井深不因將入爨誰為作鳴琴

次韻擇之梧竹二首并呈季通

宋朱子

永日長梧下清陰小院幽自憐風嫋嫋客賦雨瀏瀏作  
別今千里相思欲九秋更憐同社友復此誤淹留

月下新桐喜徐元歎至

明鍾惺

是物多妨月 桐陰殊不然  
長如晨露引 不隔晚涼天  
綠滿清虛內 光生幽獨邊  
懷新君亦爾 到在夕陽先

七言律

周履道徵賦梧桐月

明周翼

雲捲清秋畫角悲 梧桐滿地月明時  
斜穿翠葉通銀井 化作金波落硯池  
青女乍驚烏鵲夢 素娥偏惜鳳凰枝  
故人有約來何暮 獨立雲階影漸移

五言絕句

題桐葉

唐韋應物

參差剪綠綺，蕭灑覆瓊柯。憶在灋東寺，偏書此葉多。

七言絕句

丹丘

唐李商隱

青女丁寧結夜霜，羲和辛苦送朝陽。  
丹丘萬里無消息，幾對梧桐憶鳳凰。

蜀桐

李商隱

玉壘高桐拂玉繩，上含非霧下含冰。  
枉教紫鳳無棲處，

斲作秋琴彈廣陵

齊安偶題

唐

杜牧

秋聲無不攪離心  
夢澤蘼葭楚雨深  
自滴階前大梧葉  
千君何事動哀吟

夜

宋

朱子

獨宿山房夜氣清  
一窗涼月共虛明  
鄰雞未作人聲寂  
時聽高梧滴露聲

暑中雜興

宋

方岳

是非不到野谿邊只就梧桐聽雨眠  
睡熟不知谿水長  
鷺鷥飛上釣魚船

暮春

金  
蔡珪

陌上歌聲枕上聽  
秋千梧影兩亭亭  
春風三月正花好  
曉日一竿初酒醒

桐花

元  
方回

悵惜年光怨子規  
王孫見事一何遲  
等閒春過三分二  
憑仗桐花報與知

和薛伯通韻

元 耶律楚材

黃花紅葉滿秋山月浸銀河夜未闌  
寂寞梧桐深院落  
有人何處倚闌干

懷友時住夏玉泉山

元 黃清老

遠水平林翠繞城秋來風雨動離情  
玉泉千尺梧桐樹  
月下時聞落葉聲

雜詠

元 吳景奎

野人居處絕紛譁芳援疎籬八九家  
昨夜山中風雨急

曉來門巷掃桐花

梧桐

元

丁鶴年

井梧徹夜下霜風  
錦繡園林瞬息空  
老盡秋容何足惜  
鳳巢吹墮月明中

梧桐

元

鄭允端

梧桐葉上秋先到  
索索蕭蕭向樹鳴  
為報西風莫吹却  
夜深畱取聽秋聲

秋閨思

明

孫蕡

涼夜簫聲處處過  
玉樓高起偈天河  
西風瘦盡梧桐葉  
添得西窗月影多

醉起

明  
黃姬水

山中長日卧煙霞  
車馬無塵靜不譁  
石上酒醒天已暮  
一簾月色覆桐花



御定佩文齋詠物詩選卷二百八十三

欽定四庫全書

御定佩文齋詠物詩選卷二百八十四

榕類

五言律

南峯庵庵徑有古榕樹懸枝對峙宛若關門

明傅汝舟

古樹上危根依天巧作門雲飛不在外虎過定消魂野  
客逢迎少山僧出入尊朋遊坐不厭葉落滿金樽

七言絕句

柳州二月榕葉落盡偶題

唐柳宗元

宦情羈思共淒淒  
春半如秋意轉迷  
山城過雨百花盡  
榕葉滿庭鶯亂啼

榕谿閣

山谷南遷  
維舟榕下

宋劉克莊

榕聲竹影一谿風  
遷客曾來繫短蓬  
我與竹君俱晚出  
兩榕猶及識涪翁

御定佩文齋詠物詩選卷二百八十四

欽定四庫全書

御定佩文齋詠物詩選卷二百八十五

椿類

七言古

靈椿

宋劉敞

野人獨愛靈椿館  
館西靈椿聳危榦  
風揉雨煉三月餘  
奕奕中庭蔭華傘

七言絕句

天壇雜詩

金元好問

谿童相對採椿芽  
拍似陽坡說種瓜  
想得近山營馬少  
青林深處有人家

欽定四庫全書

御定佩文齋詠物詩選卷二百八十六

楠類

五言古

和宣州錢判官使院廳前石楠樹

唐  
孟郊

大樸既一副衆材爭萬殊懿茲南海華來與北壤俱生  
長如自惜雪霜無凋渝籠籠抱靈秀簇簇抽芳膚寒日

吐丹豔頰子流細珠鴛鴦花數重翡翠葉四鋪雨洗新  
妝色一枝如一姝聳異敷庭際傾妍來坐隅散彩飾机  
案餘輝盈盤盃高意因造化常情逐榮枯主公方寸中  
陶植在須臾養此奉君子賞觀日為娛始覺石楠詠價  
傾賦兩都棠頌庶可比桂詞難以踰因謝丘墟木空採  
落泥塗時來開佳姿道去臥枯株爭芳無由緣受氣如  
鬱紆抽肝在郢匠歎息何踟躕

七言古

題巴州光福寺楠木

唐嚴武

楚江長流對楚寺楠木幽生赤崖背臨谿插石盤老根  
苔色青蒼山雨痕高枝間葉鳥不度半掩白雲朝與暮  
香殿蕭條轉密陰花龕滴瀝垂青露聞道偏多越水頭  
煙生霽歛使人愁月明忽憶湘川夜猿叫還思鄂渚秋  
看君幽靄幾千丈寂寞窮山今遇賞亦知鐘梵報黃昏  
猶卧禪林戀奇響

題巴州光福寺楠木

唐史俊



近郭城南山寺深亭亭奇樹出禪林結根幽壑不知歲  
聳蓋摩天凡幾尋翠色晚將嵐氣合月光時有夜猿吟  
經行綠葉望成蓋宴坐黃花長滿襟此木嘗聞生豫章  
今朝獨秀在巴鄉凌霜不肯讓松柏作宇由來稱棟梁  
會待良工時一盼應歸法水作慈航

五言律

高楠

唐  
杜甫

楠樹色冥冥江邊一蓋青近根開藥圃接葉製茅亭落

景陰猶合微風韻可聽尋常絕醉困臥此片時醒

七言律

石楠樹

唐白居易

可憐顏色好陰涼葉剪紅牋花撲霜傘蓋低垂金翡翠  
薰籠亂搭繡衣裳春芽細炷千燈焰夏葉濃聞百和香  
見說上林無此樹只教桃柳占年芳

七言絕句

看石楠花

唐王建

留得行人忘却歸雨中  
湏是石楠枝明朝獨上銅臺路  
容見花開少許時

石楠

唐司空圖

客處媮閒未是閒  
石楠雖好懶頻攀  
如何風葉西歸路  
吹斷寒雲見故山

御定佩文齋詠物詩選卷二百八十六